

Pelampau Agama: Memahami dan Menghadapi

Azhar Ibrahim Alwee
Universiti Nasional Singapura

Pelampau agama digeruni. Mereka tak semestinya datang dengan tunggangan senjata api. Tapi mereka mudah untuk kita kenali dalam kehidupan seharian masakini.

Apabila dikatakan seorang itu melampau, bererti ianya telah melebihi batas yang dibenarkan dan yang dianjurkan. Ertinya mereka telah melanggar sempadan norma dan etika yang telah disepakati.

Dalam sejarah manusia, pelbagai gerombolan pelampau agama timbul, termasuk yang dikalahkan dan yang menang, serta yang menyusup di bawah permukaan.

Dalam pemahaman hari ini, pelampau ini sering dikenal dalam bahasa Inggeris, dengan rujukan sebagai *extremist, radical, fundamentalist* dan sepertinya itu, walaupun setiap satu digunakan dengan nuansa-nuansa tertentu.

Rata-rata manusia beragama dan jemaah beriman menolak apa jua sikap pelampau agama, sama ada dari tradisi agama lain maupun dari tradisi agama mereka sendiri.

Sikap melampau adalah sikap yang diseru supaya kita jauhi dan hindari.

Mencirikan sifat pelampau penting agar menjadi peringatan pada semua. Golongan ini mempunyai kecenderungan, antaranya: **(a)** menggunakan kekerasan fisik untuk mencapai matlamat mereka; **(b)** mendesak semua menerima idea dan praktis; **(c)** mencabar sesiapa yang tidak sehaluan; **(d)** menghukum sewenangnyanya atas dasar hukum yang mereka pegang atau klaim mereka diamanahkan; **(e)** menuduh lawanan mereka bersekongkol dengan musuh agama; **(f)** memalukan lawanan mereka dengan tuduhan dan cercaan; **(g)** menekan golongan lain untuk bersama mereka dalam memusuhi lawanan mereka; **(h)** membantah apa jua kerjasama dengan golongan yang dianggap tidak layak dan tidak berhak diberi penghormatan; **(i)** menumbuhkan sikap benci terhadap mereka yang dianggap musuh atau yang tak beriman; **(j)** menjatuhkan maruah dan nama baik lawan mereka; **(k)** mengugut mereka yang tidak mahu bersama mereka dengan **(l)** mengugut lebih banyak tindakan dan bantahan sehingga sanggup; **(m)** menceroboh hak dan kebebasan orang lain; **(n)** mengkafirkan musuh mereka dengan sewenang-wenangnyanya sehingga **(o)** mengelirukan yang lain bahwa musuh mereka itu “halal” kalau dihapuskan, dipinggirkan dan diperkecilkan; **(p)** sesuka mengharamkan atas perkara yang halal atau yang tidak merosak sifatnya; **(q)** menimbulkan bibit saling mencurigai antara manusia; **(r)** mudah mengutuk dan mengharap bala dan musibah kepada yang lain; dan akhir sekali **(s)** bersedia menghalalkan apa jua cara untuk mencapai matlamat yang mereka yakini.

Semua tradisi agama, sepanjang sejarah, menghadapi masalah timbulnya golongan pelampau ini, yang muncul dalam bentuk yang nyata seperti gerombolan tentera, ataupun yang bersembunyi disebalik jubah kewarakan maupun di kerusi kependetaan.

Mereka menunjukkan watak otoritarian dalam tutur, perbuatan dan pergaulan. Seringkali titik tolak pendirian tegar mereka itu adalah kuasa, nama, prestig dan hak untuk menegakkan ajaran yang mereka yakini.

Kelompok ini menjadi duri dalam daging, walaupun tidak mengaibkan nama baik para penganut agama yang rata-rata menolak sikap dan sifat golongan pelampau.

Apakah ciri utama golongan pelampau ini. **Pertama** mereka ini boleh saja bertindak secara kekerasan terhadap golongan yang mereka halalkan untuk dimusuhi, dicemuhi dan dilaknati.

Paling ketara ialah sikap taksub yang mereka pegang kerana merekalah memiliki kebenaran yang dibawa dalam agama itu, sedangkan lain adalah songsang, jahil, pendosa, dan pengkhianat.

Kedua, dengan taksub kerana mereka itu serba benar, lantas berhak memaksakan pemahaman dan praktis mereka terhadap orang lain, sama ada yang seagama ataupun tidak.

Paling nyata bukan saja mereka sanggup bertindak dengan keras, tetapi mereka sanggup berlafaz dengan culas, cepat bersorak mengaibkan lawan mereka, dan sanggup menuduh berbuat fitnah.

Ketiga, bagi mereka hukum dan hukuman tafsiran mereka adalah menyelamatkan kemungkar. Perbedaan pendapat terus dicap pengkhianatan dan kerosakan akidah.

Dari tutur dan tindak, mereka mempamerkan sikap paling tidak beradab, ataupun “kurang ajar” dalam pengertian umum.

Tapi bagi mereka semua itu, halal, wajib dan jalan terbaik dalam memenuhi tugas suci mereka menegakkan kebenaran yang mereka saja miliki dan ketahui.

Mereka senang menyebut “atas nama kebenaran”, “atas nama Tuhan”, ‘mereka pilihan Tuhan,’ sehingga ada jemaah lain yang tertarik, terpegun dan kagum akan tindakan, usulan dan seruan mereka.

Tapi dalam sejarah juga atas kesadaran manusia terhadap jalan keadilan, kemanusiaan dan kerohanian, kaedah kepelampauan terus dikutuk dan ditegah.

Dengan nurani keagamaan yang mantap, golongan pelampau ini terus diingatkan sebagai golongan yang merosakkan nama baik agama dan melanggar susila kerukunan manusia.

Dalam penguatkuasaan undang-undang, para pelampau agama boleh dijejaki dan ditahan. Instrumen undang-undang mungkin berjaya tetapi ianya tidak akan berkesan selagi jemaah agama itu sendiri tidak tegas menangani soal pelampau ini.

Barang diingat, pelampau ini bukan saja yang mahu meruntuhkan sistem dan struktur yang sedia ada, tetapi mereka juga mahu merosakkan pemikiran yang waras, hemah dan bertanggungjawab.

Namun, nurani kemanusiaan yang ampuh berbekal keimanan yang selalu berinsaf, akan dapat menjauhi bongkak dan lagak pelampau agama. Inilah nurani keimanan dan kemanusiaan yang menjadi harapan untuk menangani pelampau agama yang telah, akan dan mungkin timbul di sekeliling kita.

Semua yang melampau harus ditegur, dikendurkan dan disedarkan. Jalan nurani dan rohani dapat membantu. Membumi dan terisi dengan tradisi agama yang mapan adalah pengelak kepelampauan ini.
